



**SECONDA SESSIONE URDINARIA DI U 2018**  
**2EME SESSION ORDINAIRE DE 2018**  
**RIUNIONE DI I 25 È 26 D'UTTOBRE**  
**REUNION DES 25 ET 26 OCTOBRE**

2018/O2/075

*Question déposée par M. Paulu Santu PARIGI*  
*Au nom du groupe FEMU A CORSICA*

**OBJET : Intarvinenti in lingue corsa.**

O sgiò cunsigliere, l'articulu 7 di a lege n<sup>u</sup> 2002-92 di u 22 di ghjinnaghju di u 2002 insegna di modu spificu l'obligu d'offerta pè u Statu di a lingua corsa in tutte e scole primarie.

Da pudè risponde à st'ogettivu, sapendu chì tutti i maestri ùn sò, per oghje, in pede di pruponelu à i so sculari, sò stati riclutati da tandu uni belli pochi d'intervinenti, una trentina s'o ùn mi sbagliu. Questi vanu à u migliò fà per una ora è mezu à settimana in ogni classa chì ci n'hà bisognu. Dicu à u migliò fà perchè si sà chì l'offerta averia da esse di trè ore settimanale, cumu ella vene precisata in la lettara ritturale publicata ogni annu à prupostu di l'insignamentu di a lingua in lu primariu è u sigundariu.

Per rimpattà e mancanze in mezi umani furmati, hè statu messu in anda un pianu di furmazione di i prufessori di e scole chì ne simu oramai à l'iniziu di u terzu annu. In tantu, i intarvinenti travaglianu per a maiò parte in CDI, ad altezza di 18 ore settimanale, volesi di ch'elli campanu guasi à limosina cù u pocu stantu ch'elli si buscanu cù u so sudore.

Or casca chì duie settimane fà, l'ottu intervinenti bastiacchi, cuntrattualizati dunque in CDI à 18 ore, si sò intesi privene da u ghjornu à u lindumane ch'elli li calavanu i so servizii à chì à 15 ore, à chì à più pocu. Cù stu modu d'azzione di i servizii dipartimentali, pocu accrianzatu ne cunvinarete, si ne ghjunghje à duie cose :

- calcicà i diritti suciali di parsunali in situazione socioprufizionale d'inforse
- calcicà i diritti di a lingua, propiu à discapitu di a cunvinzione Statu-Cullittività di Corsica firmata trà u Prisdente di l'esecutivu, u Prifettu è u Rittore.

Allora e mo dumande saranu queste, o sgiò cunsigliere :

- à chì ne simu oghje di a situazione particolare di sti persunali bastiacchi ?

- più à a larga, s'ellu duvia dà suddisfazione u grande pianu di furmazione di i prufessori di e scole, allocca à i cinque anni di a so durata, averianu da diminuì, in logica, i bisogni in intarvinenti. Chì conta di fà u cunsigliu esecutivu per ùn lascià sti persunali, è tuttu u capitale di cumpitenza in furmazione in lingua corsa ch'elli pussedenu, nantu à a petra lavata, una volta scadutu u bisognu di a so prisenza in le scole primarie di Corsica ?

Vi ringraziu.